



Broj: 01/1-02-149/17
Ilijaš, 31.01.2017. godine

Z A P I S N I K

sa 5. (pete) sjednice Općinskog vijeća Ilijaš, održane dana 31.01.2017. godine, sa početkom u 10:00h.

Petom sjednicom Općinskog vijeća Ilijaš predsjedavao je predsjedavajući OV-a Ilijaš g-din Mahir Dević.

Prisutni vijećnici:

RB.	IME I PREZIME
	SDA
1	MAHIR DEVIĆ
2	ANEL BUMBULOVIĆ
3	MUAMER DERVIŠEVIĆ
4	ALMA OMERović
5	MEHMED SINANOVIĆ
6	ADEM ALIĆ
7	SAUDIN DURMIĆ
8	ARMIN MATORUGA
9	SEMIR DEDIĆ
10	HALID DIZDAREVIĆ
11	-
12	MELISA MATORUGA
13	ALEN HASKOVIĆ
	SDP
14	ALAN ŠERAK
15	-
16	MIRSAD OSMANOVIĆ
	SBB-FAHRUDIN RADONČIĆ
17	AKIF BEŠLIJA
18	SEAD ŠEHIĆ
	BPS-SEFER HALILOVIĆ
19	MUHAMED HANDŽIĆ
20	ALMIR ŠPIODIĆ
	GS
21	EDHEM HASANOVIĆ
22	ASIM MUJIĆ
	DF
23	SEMIR DIZDAREVIĆ
	LDS
24	MEHO DŽINDO
	STRANKA ZA SREDNJE
25	BESIM GLJIVA

Odsutni vijećnici:

1. Rasim Šehić i
2. Damir Filipović

Prisutni gosti:

1. Nermina Durić-Kahvedžić-Radio Ilijaš
2. TV Vogošća
3. TV SA
4. Mehmed Smajlović – predsjednik Savjeta MZ Mrakovo
5. Meho Mešetović – predsjednik Savjeta MZ Ilijaš Grad
6. Mirsad Hamzić – predsjednik Savjeta MZ Malešići
7. Omer Kadrić - komandir PS Ilijaš

Ostali prisutni:

1. Akif Fazlić – općinski načelnik
2. Sanja Zagorac-Jozić – pomoćnik načelnika
3. Sadeta Brkić – pomoćnik načelnika
4. Meliha Avdibegović – pomoćnik načelnika
5. Zdravko Barić – pomoćnik načelnika
6. Nijaz Spahić – pomoćnik načelnika
7. Ilda Kahrman – sekretar OV-a Ilijaš
8. Muvedeta Fazlić – šef odsjeka za opću upravu
9. Vahid Hadžiabdić – građevinski inspektor
10. Sadik Alić – komunalni inspektor
11. Adha Masnopita – stručni saradnik u Službi za društvene djelatnosti
12. Maida Habibović – zapisničar

MAHIR DEVIĆ – predsjedavajući

Otvorio je sjednicu i konstatovao da postoji kvorum za odlučivanje (prisutna 23 vijećnika).

Naglasio je da prilikom snimanja četvrte sjednice OV-a Ilijaš došlo do tehničkih problema tako da jedan dio sjednice nije snimljen, pa je možda bilo grešaka kod same izrade zapisnika. Također, u materijalima ste dobili zapisnik u kome nedostaju dvije stranice, a koje ste danas dobili na stolove. Putem e-maila ste dobili ispravan zapisnik u cjelosti. Navedeni zapisnik dajem na razmatranje, uz izvinjenje Stručne službe OV-a i općinskog načelnika za ove tehničke greške.

MUHAMED HANDŽIĆ – vijećnik BPS-a

Vi ste već naveli tehničke greške i to se dešava. Međutim, mi imamo još problema kada je u pitanju ovaj softver. Ne prenosimo kompletne podatke sa ekrana u zapisnik, tj. prilikom glasanja ne možemo utvrditi putem zapisnika ko je kako glasao (pojedinačno), nego se to prikazuje samo zbirno. Znači, dok predsjedavajući ili zamjenik predsjedavajućeg ne pročitaju imenom i prezimenom vijećnika, ne znamo ko je kako glasao. Iz tog razloga Vas molim kada je u pitanju glasanje da glasovno prenosimo kako bi imali podatke za dalji period.

AKIF BEŠLIJA – vijećnik SBB-a

U zapisniku je napravljena greška kod upisa glasanja za amandmane pod tačkom 4. Treba upisati da su vijećnici SBB-a bili protiv amandmana.

MAHIR DEVIĆ – predsjedavajući

Uz opravdanu primjedb u kolege Muhameda Handžića u budućnosti unijeti u zapisnik, a ako ne može elektronski, možemo ručno zabilježiti vijećnike koji su bili ZA, PROTIV i SUZDRŽANI. Kada je u pitanju pojedinačno glasanje, prozivat ću imenom i prezimenom kao što smo to radili i ranije.

MIRSAD OSMANOVIĆ – vijećnik SDP-a

Kada su tiče moje diskusije i primjedbi na vijećnička pitanja od prethodne sjednice navedeno je samo da sam imao primjedbi, ali nije navedeno obrazloženje za obezbjeđenje prevoza djece iz Ribarića i vezano za afirmaciju rada u mjesnim zajednicama kada sam čak pohvalio ljude koji su završili 11 audit gdje sam sugerisao da sve procedure koje su vezane za rad mjesnih zajednica, a one su većinom u standardizaciji da se prenesu građanima kako bi građani mogli vidjeti koji im je alat za uticaj na rad našeg Vijeća i davanje svojih primjedbi na dokumente koje mi usvajamo.

Što se tiče diskusije vezano za Sarajevo-šume, "presječen" sam u dijelu gdje su značajni podaci Sarajevo-šuma ili Uprave za šumarstvo, a vezani za odnos Sarajevo-šuma i mjesta Ilijaša i građana kada se tiče sječe i uposlenosti. Taj pregled može koristiti, ne samo nama vijećnicima, nego i općinskom organu i ono što nam sljedi pri donošenju novog Zakona o Sarajevo-šumama.

Najvjerovatnije ću ovo što je propušteno dostaviti u pismenoj formi Stručnoj službi OV-a i općinskog načelnika.

Zahvaljujem se Stručnoj službi OV-a i općinskog načelnika što je dostavila Etički kodeks svim vijećnicima.

Nadam se da će kolege pročitati ovaj dokument koji je značajan i dat će kvalitet u radu OV-a.

MAHIR DEVIĆ – predsjedavajući

Dao je na glasanje zapisnik uz izmjenu koju je vijećnik Akif Bešlija iznio.

OV-e je jednoglasno usvojilo zapisnik sa 4. sjednice OV-a

Zatim je konstatovao da je predlagatelj povukao 11. tačku dnevnog reda Prijedlog rješenja iz imovinsko-pravne oblasti pod a, b, c i d zbog harmonizacije propisa koji tretiraju navedenu oblast, tako da će ova rješenja imati na nekoj od narednih sjednica OV-a.

Pročitao je predložni dnevni red od 12 tačaka i dao na razmatranje.

MIRSAD OSMANOVIĆ – vijećnik SDP-a

Predlažem da se tačka 10. Prijedlog Odluke o izmjeni člana 1. Odluke Općinskog vijeća Općine Ilijaš br.01/1-02-1726-12/16 od 26.07.2016. godine povuče sa dnevnog reda dok se ne pribavi mišljenje Pravobranilaštva Kantona Sarajevo.

Obrazloženje: Evo već dvije sjednice Vijeća dobivamo dokumente gdje se kaže da ili nismo nadležni ili nepotpune dokumente. Danas razmatramo isto jedan dokument,

odnosno ispravljamo grešku od ranije dok nismo dobili mišljenje Pravobranilaštva, pa evo i ovo povlačenje rješenja. Tako da smatram da kod prodaje javnog dobra neposrednom pogodbom trebamo imati mišljenje Pravobranilaštva KS i ovu tačku možemo staviti na dnevni red na jednoj od slijedećih sjednica Vijeća.

AKIF FAZLIĆ – općinski načelnik

Predlagač prihvata prijedlog da se 10. tačka povuče sa dnevnog reda.

MAHIR DEVIĆ – predsjedavajući

Sada je dnevni red sa 11. tačaka koji je dao na glasanje.

OV-e je jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 4. sjednice
3. Izvještaj o realizaciji Programa rada Općinskog vijeća Ilijaš za 2016. godinu
4. Izvještaj o rješavanju upravnih predmeta u 2016. godini u Jedinostvenom općinskom organu uprave općine Ilijaš
5. Prijedlog Odluke o utvrđivanju prosječne konačne građevinske cijene 1 m² korisne stambene površine u stambenoj izgradnji na području općine Ilijaš za 2017. godinu
6. Prijedlog Odluke o visini bazne cijene za određivanje naknade za uređenje građevinskog zemljišta na području općine Ilijaš za 2017. godinu
7. Prijedlog Odluke o utvrđivanju raspona cijena za neizgrađenog građevinsko zemljište prema zonama građevinskog zemljišta u općini Ilijaš za 2017. godinu
8. Prijedlog Odluke o stavljanju van snage Odluke o prodaji jednosobnog stana u ul.126.Ilijaške brigade br.3/Pr
9. Prijedlog Odluke o izmjeni i dopuni Odluke o dodjeli mandata za članove savjeta mjesnih zajednica na području općine Ilijaš
10. Prijedlog Zaključka kojim se odobravaju novčana sredstva u iznosu od 30.000,00 KM (trideset hiljada KM) na ime pomoći licima koja se nađu u stanju socijalne potrebe, a svoja prava ne mogu ostvariti putem Službe socijalne zaštite općine Ilijaš
11. Informacija o stanju kriminaliteta, javnog reda i mira i sigurnosti saobraćaja na području općine Ilijaš za 2016. godinu.

AD-1

Vijećnička pitanja i inicijative

SEMIR DIZDAREVIĆ – vijećnik DF-a

Inicijative:

1. Pokrećem inicijativu da se iz Budžeta Opštine Ilijaš izdvoje sredstva za pomoć porodici Hasečić, a zbog sanacije nedavno izgorjelog stana u ul.126.Ilijaške brigade br.57.

Obrazloženje: Svima nam je poznato da je 29.01.2017. godine u večernjim satima došlo do požara u ul.126.Ilijaške brigade u stanu naših sugrađana. Šteta nakon požara je velika, a svi znamo da sanacija nije jeftina. Ovakvih slučajeva nema puno i smatram da mi kao Opština trebamo i moramo pomoći našim sugrađanima u ovakvim situacijama.

2. Pokrećem inicijativu da se izvrši uklanjanje tzv. usporivača brzine kod OŠ "Stari

Ilijaš" i postave ležeći policajci cijelom širinom ceste od trotoara do trotoara.

Obrazloženje: Postoje dva razloga za pokretanje ove inicijative. Prvi razlog je nepotpuna učinkovitost postojećih usporivača brzine, jer svi smo svjedoci čestog izbjegavanja istih prelaskom u drugu saobraćajnu traku iz razloga jer isti nisu postavljeni cijelom širinom ceste. Vozači, zaobilazeći ih ne usporavaju i ugrožavaju bezbjednost djece. Ne moram napominjati da smo zbog ovog nedavno imali nezgodu gdje je vozilo udarilo dvije učenice ove škole. Drugi razlog je oštećenje vozila vozača koji poštuju postavljene usporivače. Svako ko je barem jednom prešao preko ovih usporivača osjetio je jake udare vozila bez obzira kojom je brzinom prešao preko istih. Dakle, oštećuju se dijelovi ovjesa vozila (amortizeri, kugle, krajnice i sl.). Obični ležeći policajci su po meni puno bolje rješenje kako zbog pješaka, tako i zbog vlasnika vozila.

3. Pokrećem inicijativu da se lokacija održavanja vjenčanja iz hodnika Matičnog ureda premjesti u neku od prostorija Općine Ilijaš.

Obrazloženje: Budući da se u posljednje vrijeme svečani čin sklapanja braka u našoj općini odvija u hodniku Matičnog ureda, što smatram neprihvatljivim, pokrećem inicijativu za izmještanje istog u neke od postojećih prostorija. Nedopustivo je da jedan od najvažnijih događaja u životu ljudi, mi kao općina, održavamo doslovno u hodniku ovako lijepe zgrade sa improviziranim stolom i bez mogućnosti ulaska većeg broja zvanica. Stoga, moj prijedlog je, ili da se vjenčanja održavaju u ovoj sali ovdje, mada smatram da je malo teško doći posebno mladenkama u vjenčanicama ili da se izdvoje finansijska sredstva, a smatram da ne treba nešto puno novca i da se uredi prethodna sala OV-a, sa skromnom dekoracijom i mjestima za sjedenje mladenaca i zvanica.

MIRSAD OSMANOVIĆ – vijećnik SDP-a

Prošli put je prošla nezapažena inicijativa ili komentar predsjedavajućeg kada su u pitanju inicijative koje se predlažu u formi zaključka i to je dobro i ja predlažem slijedeću inicijativu: Inicijativa:

1. Predlažem da pokrenuta inicijativa od strane vijećnika koja se predlaže da je Vijeće usvoji u formi zaključka, usvaja ili glasa za zaključak, na narednoj sjednici po pribavljanju mišljenja nadležne službe ili organa kojem se ista upućuje.
2. Pokrećem inicijativu da nadležna služba evidentira sve novoizgrađene infrastrukturene objekte čiji rok garancije nije istekao, a koji nisu kvalitetno urađeni, koji se urušavaju, kako bi obavezali izvođače radova da odrade posao u skladu sa tenderskim zahtjevom ili da nadoknadi pričinjenu štetu građanima, odnosno općini. Također tražim evidenciju izvođača radova i nadzora na navedenim projektima. Predlažem da se inicijativa usvoji u formi zaključka.
3. Pokrećem inicijativu da današnje dnevnice doniramo za liječenje djevojčice Žero Asime.
4. Pokrećem inicijativu kojom pozivam načelnika općine Ilijaš i predsjedavajućeg Općinskog vijeća Ilijaš da obiđemo Ribariće, a vezano za moje pitanje prevoza učenika iz Ribarića i osvjetljenja onog dijela preko mosta.

Pitanja:

1. U zapisniku sa prošle sjednice nije evidentirano moje pitanje:
"Ko je izvođač radova na putnom pravcu Gaz-Bjelike (MZ Kamenica) i jesu li mu isplaćena sredstva za posao koji nije uradio?"
2. Dokle su stigli radovi na putnim pravcima: Šehovići-Borje, Odžak Nanići-Dautovići?
Ko je izvođač radova? Koji je bio rok izvođenja radova?
3. Koja je procedura u postupku davanja poslova:

I Kada se vrši rekonstrukcija infrastrukturnog objekta ?

II Kada se gradi novi infrastrukturni objekat?

4. Ima li i jedan novoizgrađeni putni pravac koji je u tenderu imao zahtjev da debljina asfalta treba biti ispod 5 cm?

SDP snažno podržava svakog privrednika koji odradi posao kvalitetno i na vrijeme, a na nama ne trebaju ruke u Vijeću da se borimo i izborimo protiv izvođača radova, nadzora i ne daj bože saradnika iz ove "kuće" koji traže ekstra dobit na uštrb kvalitete pri realizaciji projekta.

ARMIN MATORUGA – vijećnik SDA

Inicijative:

1. Pokrećem inicijativu prema nadležnoj općinskoj službi i javnom preduzeću JKP "Rad" s ciljem uklanjanja i obilježavanja dvije divlje deponije u naselju Donja Karaula, odnosno na dionici puta Donja Karaula-Malešićki most. Nadležnu službu molim da odobre rad mašina kako bi se ova deponija uredila i prekrila humusom, a od nadležnog javnog preduzeća zahtijevam 2 (dva) znaka zabrane odlaganja smeća. Problem divljih deponija na ovom potezu je jako važan i ugrožava stanovnike ovog naselja ako i sve šetače i rekreativce koji se ovim putem kreću i uživaju u prirodi. Divlje deponije ugrožavaju pejzaž, stvaraju neprijatan miris i privlače pse lutalice, koji su konstantna opasnost građanima.
2. Pokrećem inicijativu za rekonstrukciju, zamjenu ili popravak kontejnera za smeće na prostoru općine Ilijaš.

Obrazloženje: U više navrata su mi se obratili građani i grupe građana sa pritužbama na ne redovan odvoz smeća, te na neadekvatne kontejnere. Većina kontejnera su bez poklopaca, te se na taj način omogućava psima lutalicama da raznose smeće, te time ugrožavaju higijenske uslove stanovnika općine Ilijaš. Također, tražim od preduzeća koje vrši odvoz smeća da mi dostavi operativni plan rada preduzeća, te plan nabavke novih i rekonstrukcije starih kontejnera, za 2016. i 2017. godinu.

MEHMED SINANOVIĆ – vijećnik SDA

Pitanje:

1. Zašto brzi vozovi ne staju na željezničkoj stanici u Podlugovima? Inicijativu uputiti nadležnima.

ADEM ALIĆ – vijećnik SDA

Inicijativa:

1. Pokrećem inicijativu da općinski načelnik putem nadležne službe i nadležnog ministarstva Kantona Sarajevo, preciznije i detaljnije uredi oblast odvoženja smeća, kabastog materijala, plaćanja računa istog, zamjene i popravke hajfiša/kontejnera, ispiranja istih, približavanja usluga građanima, nabavke i drugih i drugačijih posuda kao i uspostave obligacionih odnosa između davaoca i primaoca usluga na cijelom prostoru općine Ilijaš.

ALMIR ŠPIODIĆ – vijećnik BPS-a

Pitanja:

1. Na osnovu prava pristupa informaciji tražim da mi se dostavi informacija od Matičnog ureda općine Ilijaš koliko je sklopljeno bračnih zajednica u periodu od 01.01.2013. godine do 30.12.2016. godine, gdje jedan supružnik ima strano ili dvojno državljanstvo?

2. Zahtjevam od Zavoda za zapošljavanje općine Ilijaš da dostavi podatke koliko je osoba registrovano kao nezaposleno za period januar 2017. godine. Također, od istog Zavoda zahtjevam da mi se dostavi izvještaj po slijedećim elementima:
 - Koliko je osoba skinuto sa biroa za zapošljavanje u protekle 3 (tri) godine, a koji su zasnovali radni odnos u BiH?
 - Koliko je osoba skinuta sa biroa za zapošljavanje zbog neredovnog javljanja i isteka prava po starosnoj dobi?
 - Koliko je osoba skinuto sa biroa za zapošljavanje zbog napuštanja BiH i odlaska u druge zemlje;
 - Koliko je osoba skinuto sa biroa za zapošljavanje po osnovu primanja koja prelaze preko 208,00 KM?

ANEL BUMBULOVIĆ – vijećnik SDA

Inicijativa:

1. Pokrećem inicijativu prema Kantonalnoj Direkciji za ceste da se izvrši zamjena – podešavanje saobraćajnog ogledala na raskrsnici ulice Moševačka i ul.Žrtava genocida u Srebrenici.

Obrazloženje: Iako je 2016. godine izvršena potpuna rekonstrukcija i proširenje navedene raskrsnice i stvoreni su bolji uvjeti za odvijanje saobraćaja, i dalje problem vozačima i opasnost u saobraćaju predstavlja nepreglednost iz pravca Ilijaša. Na pomenutoj lokaciji već se nalazi postavljeno saobraćajno ogledalo koje je već duži vremenski period polomljeno i neadekvatno postavljeno.

MUHAMED HANDŽIĆ – vijećnik BPS-a

Podržavam inicijativu kolege Dizdarevića, ali on nije predložio zaključak te inicijative, a prije toga moramo vidjeti sa načelnikom sa čime raspoložemo. Iz tog razloga bi bilo dobro da nam date pet minuta pauze.

MAHIR DEVIĆ – predsjedavajući

Nema potrebe da pravimo pauzu, dobit ćete obrazloženje.

BESIM GLJIVA – vijećnik Stranke za Srednje

Pitanje:

1. Iz kojih razloga je obustavljena autobuska linija Dragoradi-Sarajevo sa polaskom u 12:00 h iz Dragorada i povratkom iz Sarajeva u 19:30 h. Navedena linija je saobraćala u punom kapacitetu kada se tiče broja putnika. Neophodno je u što kraćem roku ponovo uspostaviti navedenu liniju, jer je prevoz za ovo područje ionako slabo riješen u poslijeratnom periodu.

ALAN ŠERAK – vijećnik SDP-a

Pitanje:

1. Upućujem pitanje nadležnoj službi i tražim odgovor na inicijativu građana Malešića i šire, naime radi se o rekonstrukciji regionalne ceste Ilijaš-Sarajevo u mjestu Malešići.
Tokom početka devetog mjeseca (septembar 2016. godine) došlo je do rekonstrukcije puta u navedenom naselju od strane Direkcije za ceste Kantona Sarajevo, gdje je izvođač firma "Bosna-putevi" Sarajevo. Tom prilikom radovi su se odvijali vrlo sporo i ušlo se u mjesec decembar i tom prilikom radovi su prekinuti ili

možda i završeni, ali sada su ostali problemi. Tokom rekonstrukcije ceste na odvodnji podvožnjaka, autobuskim stajalištima, veritkalnoj i horizontalnoj signalizaciji, i pored toga da će saobraćajnica biti završena u toku četrdeset i pet dana koja je bila na web stranici Kantona Sarajevo i Info Ilijaš.

Obrazloženje: Veći broj građana me molilo da ovaj problem uputim na Općinskom vijeću i evo sad to činim, a radi se da je pomenuta firma i Direkcija za ceste Kantona Sarajevo ovu dionicu nazvala Modernom saobraćajnicom koja se rekonstruiše od prilike nakon 30 godina i sada je izvršena sanacija gdje je napravljena nedopustiva greška kod autobuskih stajališta. Autobusi koji se saobraćaju Ilijaš-Sarajevo nemaju prostor za ulaz na autobusko stajalište ili bolje rečeno nemaju stajalište, te se zaustavljaju na pola kolovozne trake i tom prilikom dovode do ometanja saobraćaja i sigurnost svih putnika i pješaka na ovom prostoru. Tražeći odgovor na ovo pitanje se može zaključiti da iz Odluke i zakona o autobuskim stajalištima FBiH koji stoji da minimum mora biti stajalište 30 m ili tamo gdje dozvoljava 50 m sa svim elementima kao što je red vožnje, klupa za putnike, nadstrešnice itd. Ovom prilikom tražim da se Općinsko vijeće upozna i da zauzme stav o ovakvom načinu na čitavom prostoru kada je u pitanju regionalna cesta i lokalni putevi gdje ima potrebe. Signalizacija nije postavljena na ovom prostoru i ako ima potrebe zbog toga što je ovo naselje urbano gdje ima područna škola i djeca koja koriste ovaj put ili autobuski prevoz i sama signalizacija bi olakšala samu bezbjednost i zaštitila naše sve građane. Podvožnjaci su ostali u nižoj tački od regionalne ceste i oni su sada opasnost za djecu koja prolaze za školu i same građane, samim tim nakon svake kiše u podvožnjaku ostane količina vode koja zna rasti do 50 cm i više.

Nakon ovih navoda kontaktirao sam predsjednika savjeta MZ Malešići Mirsada Hamzića i pitao za ove probleme gdje me upoznao da je i on u nekoliko navrata uputio dopise sa ovakvim navodima i zatražio da se upoznaju svi nadležni od Ministarstva saobraćaja Kantona Sarajevo do inspekcije za ovu oblast, kao i sam investitor koji je nadzirao ovaj projekat i sada je na potezu da se i općina uključi za ovakvim problemom, u protivnom mi nećemo odustati da ovakvim se načinom izvrši rekonstrukcija na uštrb same općine Ilijaš gdje neko ne želi da pokaže kako u Ilijašu nema i ne treba projekti koji su bolji od prethodnih, samim tim mi smo imali bolje stajalište i sigurnije nego što sada imamo i onda se postavlja pitanje o kakvoj se saobraćajnici radi koja nosi naziv Modernizacija novih saobraćajnica.

2. Drugo pitanje koje želim da postavim i ne mogu da vjerujem da niko od prisutnih vijećnika nije izrazio nezadovoljstvo zimskim održavanjem puteva na području općine Ilijaš. Ne znam da li nama odgovara da postojeća firma koja održava naše lokalne puteve radi na način kako radi, ali mislim da je krajnje vrijeme da redefinišemo naš odnos sa tom firmom, da vidimo šta su to ugovorne obaveze njihove naspram nas i koliko sredstava povlače za zimsko održavanje puteva. Imajući u vidu putne pravce na kojima se ni dan danas, neovisno o prioritetima gdje se oni nalaze, ne mogu vozila da saobraćaju bez zimske opreme. Govorim o Novom Naselju i naselju Karašnica.

Postavljam pitanje uvaženom načelniku da li je izmirio sve obaveze po pitanju prispjelih faktura od strane te firme, ako nije, odnosno volio bih da dobijem odgovor? Također, volio bih da vidim jeste li ikada odbili da izvršite isplatu fakture po osnovu ugovora ili umanjili istu?

S druge strane, kada su u pitanju ceste koje se održavaju, a radi se o cestama koje po kategorizaciji pripadaju Direkciji za ceste Kantona Sarajevo. Kružni tok ul. Bogumilska nikada nije očišćen. Rečeno mi je da je to nadležnost Direkcije za ceste Kantona Sarajevo. Trotoari u Ilijašu nikada nisu očišćeni, a onda dobijem jednu poražavajuću informaciju da Direkcija za ceste Kantona Sarajevo nije ni

predvidjela da se čiste trotoari u Ilijašu. Ukoliko je to istina, onda je to poraz administracije općine Ilijaš na čelu sa gospodinom Akifom Fazlićem. Te stvari se kod nas ne mogu i ne smiju dešavati. Kada se u općini Centar ne budu čistili trotoari, onda neka se ne čiste i u Ilijašu. Sve dok to rade u svim općinama, treba da rade i kod nas. Od vas svakako očekujem da reagujete i tu stvar ispravite.

S druge strane, polako me počinju nervirati nadležnosti, ne nadležnosti i sve ostalo što treba kada kažemo to nije u našoj nadležnosti, nego je u kantonalnoj nadležnosti i mi s tim stvarima nemamo ništa. Imamo itekako, jer se te stvari dešavaju u našoj "avliji". I neko mora ispred općine biti zadužen da reaguje. Možda nije najbolje izdavati prekršajna rješenja ili neke druge stvari, ali može se uzati telefon i kontaktirati nadležne. Najlakše je reći mi nemamo nadležnosti, a počelo je drugo školsko polugodište i djeca nam u škole idu po trotoarima koji nisu očišćeni i svi šutimo o tome. Niko neće da se bavi pravom problematikom, a lokalna zajednica je itekako dužna da te stvari rješavaju.

3. Vidim da je došlo do određenih kadrovskih promjena kada su u pitanju sportska udruženja i svakako pozdravljam sve ono što članovi tih udruženja smatraju kao dobro i iskreno se nadam da ćemo u konačnici stati u kraj finansiranju nekih "para" udruženja koja smo do sada imali i da ćemo jednom za sva vremena, govorim o sportskim kolektivima, riješiti način finansiranja tih udruženja. Treba finansirati jedno udruženje, ali ga treba finansirati kako treba. Nismo mi Minhen niti Njujork da imamo 7-8 udruženja koja se bave jednim te istim sportom. To je neprihvatljivo.

Imam pitanje za pomoćnicu načelnika za društvene djelatnosti.

4. Pitanje priključenja električne energije na sportski teren koji smo dali Sportskoj akademiji. Kako i na koji način je to izvršeno?

MAHIR DEVIĆ – predsjedavajući

Zaključio je raspravu po ovoj tački dnevnog reda i dvije stvari da mi kao Vijeće dogovorimo, a onda će načelnik dati odgovore na neka od pitanja. Klub vijećnika SDA podržava inicijativu vezano za tragediju porodice Hasečić Hasne kojoj je stan izgorio i razgovali smo sa načelnikom i on će kazati na koji način se može pomoći ovoj porodici i trebamo se izjasniti na inicijativu kolege Mirsada Osmanovića da se pomogne djevojčici Žero Asimi, vezano za naše paušale.

AKIF FAZLIĆ – općinski načelnik

Osvrnut ću se na par aktuelnih pitanja koja ste postavili.

Vezano za inicijativu za izgorjeli stan, u principu ja budžetsku rezervu koristim za dvije vrste izdavanja, a to su operacije teške bolesti i slučajevi kada imamo požare u stanu ili nečega što je značajan udar na porodicu. Ova godina je, nažalost, krenula dosta loše, jer smo imali izgorjelu kuću u Srednjem. Ovo je drugi slučaj i dao sam nalog službama da pripreme dokumentaciju i reagovat ćemo iz budžetske rezerve.

Vezano za pitanje po Zakonu o pristupu informacijama. Vama vijećnicima ne treba taj Zakon, možete kroz vijećnička pitanja ili direktno se obratiti službama i dobiti svaku vrstu informacija s kojom raspolaže organ uprave, ali ako se baš želi ići po Zakonu o pristupu informacija, onda postoji procedura. Mora se podnijeti zahtjev, prođe to službu i onda služba donese rješenje i to je taj put. Vi izaberite na koji način ćete doći do određenih informacija.

Vrlo aktuelan problem jeste javni prevoz i pogotovo prevoz učenika na liniji za Dragorade. Mi smo ranijih godina imali sreću da neko ko ima kapacitete za prevoz učenika se javi i dobije posao. Određeno vrijeme se javljao Centrotrans i Gras, a onda kroz određeno vrijeme Gras nije imao uvjeta da se javlja na tendere i uglavnom kroz proceduru je Centrotrans dobivao te poslove i vršio prevoz učenika.

Ovdje se sada radi o možda nečem trećem, sada se javila firma Globturs koja je ozbiljan prevoznicička firma i to je vjerovatno pokušaj ulaska na tržište Kantona Sarajevo. Ona je dobila jednu pojedinačnu liniju i iskače iz sistema prevoza učenika, pa ćemo vidjeti kako to operativno da riješimo.

Pitanje rekonstrukcije regionalnih cesta znamo da, budžetski, organizaciono, insitucionalno vodi Direkcija za ceste Kantona Sarajevo. Ova dva poteza koja su započeta u 2016. godini, započeta su na bazi tendera u smislu okvirnih sporazuma na dvije godine gdje su odobrena sredstva, provedeni tenderi i definisani potezi rekonstrukcije te ceste. U Malešićima je definisan potez kroz ugovor od gornjeg Malešićkog mosta do rampe. Sredstava su bila obezbjeđena u nivou u kom su izvedeni radovi u prošloj godini, a preostali dio ugovora koji nije realiziran sredstva će biti obezbjeđena kroz novi plan za 2017. godinu. Onaj potez nije završen i trebamo kroz završetak tog poteza i njegovog tehničkog prijema, kroz tu proceduru, i gledati i tražiti sve nedostatke koji se pojavljuju. Ja takođe lično mislim da se onaj potez mogao tehnički korektnije i kvalitetnije uraditi, ali ne želim u ime Direkcije govoriti, ali mi možemo tražiti i tražit ćemo od Direkcije za dostavu izvještaj.

Kada je u pitanju zimsko održavanje meni je bilo drago da ipak objektivno sagledavamo tu vrstu posla. Mi smo definisali kroz budžet cca 275.000,00 KM i kroz sve izvještaje u zadnjih nekoliko godina možete vidjeti da se isplata za tu vrstu posla iznoscila cca 200.000,00 KM i možda je u nekim godina dijelom i prelazila ovu cifru, ali to je neki okvir.

Za općinu koja ima cca 309 km² i oko 300 km lokalnih i ne kategorisanih puteva, to su nedovoljna sredstva. Mi smo na bazi programa koji podrazumjeva redovno čišćenje definisali ključne prioritete, ključne ulice, poteze, lokalne puteve i to je ono što je izvođač dobio i održava bez ikakve intervencije nas kao ugovorne strane. Osim toga imamo dosta onih ne kategorisanih puteva koji nisu u tom okviru i za koje mi dajemo pojedinačne naloge kada cijenimo da je visina snijega visoka i da to predstavlja problem građanima i također služba prati i s aspekta pripravnosti određuje te stepene kroz meteorološke prognoze. To je usvojena jedna regulativa koju već par godina vodimo i koju svi vi već poznajete.

Sada da bi malo uporedili stanje, rekao sam općina sa 300 km i sa budžetom i uporedit ćemo je sa općinom Centar koja ima ili nema više cesta, ali ona ima uplaćeno 3,5 mil. KM JKP "Rad" za zimsko čišćenje puteva i trotoara. Sada uporedite naših 200.000,00 KM i 3,5 mil. KM, pa ćemo onda govoriti o kvaliteti održavanja zimskog održavanja naše putne infrastrukture. Ono što je ovdje problem, jesu problem trotoari na regionalnoj cesti koji po nekom Zakonu o cestama i ne znam ko je bio predlagač tog zakona koji je usvojen i trotoari se ne tretiraju kao pripadajući dio ceste. Znači ne tretiraju se kao saobraćajni objekat i mi tu imamo problem da onaj ko je dobio ugovor da čisti regionalnu cestu da čisti samo kolovoz i ne čisti trotoare. Nije problem što ne čisti trotoare, problem je što sav snijeg baca na trotoare, koji su kao ostali nama. Problem je sinhronizacija čišćenja trotoara i ovo nije samo problem u Ilijašu, jer je Direkcija zauzela stav da ne čisti trotoare, nego je to ostavljeno općina i to u organizacionom smislu dakle pravi jedan problem.

Generalno, kada je u pitanju zimsko čišćenje naša obaveza i odgovornost je da su putevi prohodni i nije džaba propisana obaveza posjedovanja zimske opreme. Mi smo ovdje uvijek u nekoj poziciji izbora. Znači, koliko želimo i dokle želimo te vrste usluge da platimo do nekog nivoa ili želimo u nekom prioritetu da dio sredstava iz tog okvira usmjerimo koje

je po prioritetu bitnije. Ja mislim da, objektivno gledajući i znajući konfiguraciju prostora naše općine i finansijski okvir da je ovo stanje dosta solidno, a može biti i bolje, ali trebalo bi izdvojiti i više sredstava. Naravno da nekada ima i problema i da se možda može bolje reagovati, ali u jednom okviru i za nivo kako smo to postavili je dosta solidno.

MAHIR DEVIĆ – predsjedavajući

Dao je na glasanje inicijativu vijećnika Mirsada Osmanovića za odricanje dnevnice za liječenje Žero Asima koju je Općinsko vijeće sa 22 glasa podržalo.

Rasprava po ovoj tački dnevnog reda je zaključena, ali kolega Alan Šerak želi još nešto pitati i da ne bi bilo da Vam oduzimam riječ, evo izvolite pitajte, ali dajte da se držimo Poslovnika, tako da kad zaključim raspravu onda je to gotovo.

ALAN ŠERAK – vijećnik SDP-a

Kad zaključimo raspravu, onda nema rasprave po toj tački dnevnog reda ni načelnika niti bilo koga drugog. To je zaključenje rasprave po tački dnevnog reda ako ćemo se držati Poslovnika, onda ćemo se držati. U prošlom sazivu Vijeća, jer naravno imamo dopunska pitanja. Imali smo neke stvari koje smo htjeli razjasniti u cijeloj ovoj priči.

Obzirom da Mahir Dević to tumači kako je njemu volja, odustajem od pitanja. Očito ste zadovoljni održavanjem zimske službe na području općine Ilijaš, ali ja kao građanin apsolutno nisam i uvijek ću se boriti protiv ovakvih stvari i smatram da je ne adekvatno, ne kvalitetno i sve ostalo što jest. Uz upotrebu zimske opreme određeni pravci bi trebali biti prohodni u roku od 72 h, ali nisu ni do danas. Ako treba napraviti ćemo pauzu i otići i vidjeti kakvo je stanje. Nikada izvođaču ni jednu fakturu nismo odbili za ne učinjen posao. Sve mu se plati i ne gledamo da li je adekvatno urađeno ili nije.

Evo zvanično odustajem od pitanja i nema više nikakvih pitanja u skladu sa Poslovnikom OV-a Ilijaš.

AD-2

Izveštaj o realizaciji zaključaka sa 4. sjednice

MUHAMED HANDŽIĆ – vijećnik BPS-a

Dobili smo nepotpune zaključke ili obrazloženja u rubrici "Realizacija zaključaka" i to pod rednim brojem 1. Naime, nije navedeno, a cijenim da je imalo za potrebu, koliko je sredstava prikupljeno od vijećnika za pomoć našeg sugrađaninu i ako neko od vijećnika nije učestvovao u ovome, zašto ovdje ne piše njegovo ime i prezime. Mi se svi, ili bar većina vijećnika, odričemo u svrhu humanog ili humanitarnog rada. Ja pristajem da mi se uvijek dnevnica odbije, pa ako treba i paušal, ali isto oni koji ne učestvuju u ovome, bar da ih zabilježimo ovdje da on nije dio akcije u kojoj smo mi većina vijećnika.

ALAN ŠERAK – vijećnik SDP-a (replika)

Nije uredu da imenujemo ko nije učestvovao u ovoj humanitarnoj akciji. Međutim, volio bih da stavite imena koja jesu, pa da vidimo ko je bio human na ovaj ili onaj način.

MAHIR DEVIĆ – predsjedavajući

Već dvije sjednice mi činimo ova dobra djela i to je dobro, ali nemojte da od ovoga što

učinimo pravimo bilo kakvu vrstu populizma. Molim vas kao predsjedavajući, ako treba donijet ćemo zaključak i kazati da se godinu dana odričemo dnevnica i to ćemo dati u neki fond, ali nemojte da dalje nastavljamo ovu vrstu priče.

Zaključak je realiziran i nadležna služba može dostaviti informaciju koliko je sredstava prikupljeno.

SEAD ŠEHIĆ – vijećnik SBB-a

Kada su u pitanju dnevnice, ako je potrebno, spreman sam da se svako Vijeće odrekne dnevnice, pa ako treba i paušala, ali nije fer, jer ovo je samo, po meni, neka promocija, odvoji dnevnicu za ovo, odvoji za ono da bi se neko politički promovisao,

Za one kojima je potrebna pomoć, postoji drugi način da se prikupi humanitarna pomoć (postavi štand na ulici, posjete privatnike, ...). Mi iz SBB-a smo spremni da se odreknemo čitavog paušala, na da se odvoja 50,00 KM za ovo, pa za ono i onda se dovodimo u situaciju da pričamo da se navedu oni koji su se odrekli dnevnica i oni koji nisu.

MAHIR DEVIĆ – predsjedavajući

Pozvao sam vas da budemo svi odgovorni spram ove vrste priče, pa prema tome od naredne sjednice vodite računa o tome i na neki način smo zatvorili ovu vrstu priče.

Obzirom da diskutana po ovoj tački dnevnog reda više nije bilo, pa je OV-e jednoglasno usvojilo

Izvještaj o realizaciji zaključaka sa 4. sjednice

AD-3

Izvještaj o realizaciji Programa rada Općinskog vijeća Ilijaš za 2016. godinu

Diskutanata po ovoj tački dnevnog reda nije bilo, pa je OV-e jednoglasno usvojilo

Izvještaj o realizaciji Programa rada Općinskog vijeća Ilijaš za 2016. godinu

AD-4

Izvještaj o rješavanju upravnih predmeta u 2016. godini u Jedinstvenom općinskom organu uprave općine Ilijaš

Diskutanata po ovoj tački dnevnog reda nije bilo, pa je OV-e većinom glasova usvojilo

Izvještaj o rješavanju upravnih predmeta u 2016. godini u Jedinstvenom općinskom organu uprave općine Ilijaš

AD-5

Prijedlog Odluke o utvrđivanju prosječne konačne građevinske cijene 1 m² korisne stambene površine u stambenoj izgradnji na području općine Ilijaš za 2017. godinu

Diskutanata po ovoj tački dnevnog reda nije bilo, pa je OV-e većinom glasova usvojilo

Odluku o utvrđivanju prosječne konačne građevinske cijene 1 m² korisne stambene površine u stambenoj izgradnji na području općine Ilijaš za 2017. godinu

AD-6

Prijedlog Odluke o visini bazne cijene za određivanje naknade za uređenje građevinskog zemljišta na području općine Ilijaš za 2017. godinu

Diskutanata po ovoj tački dnevnog reda nije bilo, pa je OV-e većinom glasova usvojilo

Odluku o visini bazne cijene za određivanje naknade za uređenje građevinskog zemljišta na području općine Ilijaš za 2017. godinu

AD-7

Prijedlog Odluke o utvrđivanju raspona cijena za neizgrađenog građevinsko zemljište prema zonama građevinskog zemljišta u općini Ilijaš za 2017. godinu

Diskutanata po ovoj tački dnevnog reda nije bilo, pa je OV-e većinom glasova usvojilo

Odluku o utvrđivanju raspona cijena za neizgrađenog građevinsko zemljište prema zonama građevinskog zemljišta u općini Ilijaš za 2017. godinu

AD-8

Prijedlog Odluke o stavljanju van snage Odluke o prodaji jednosobnog stana u ul.126.Ilijaške brigade br.3/Pr

Diskutanata po ovoj tački dnevnog reda nije bilo, pa je OV-e većinom glasova usvojilo

Odluku o stavljanju van snage Odluke o prodaji jednosobnog stana u ul.126.Ilijaške brigade br.3/Pr

AD-9

Prijedlog Odluke o izmjeni i dopuni Odluke o dodjeli mandata za članove savjeta mjesnih zajednica na području općine Ilijaš

MAHIR DEVIĆ – predsjedavajući

U ovom prijedlogu imamo nekoliko izmjena koje su dostavljene na bazi cirkularnog dopisa prema predsjednicima savjeta mjesnih zajednica da pošalju prijedloge izmjena i na osnovu zaključka OV-a kada su u pitanju kolege Armin Matoruga i Almir Špiodić.

ALAN ŠERAK – vijećnik SDP-a

Do kada su stari predsjednici savjeta, bili predsjednici savjeta mjesnih zajednica?

MAHIR DEVIĆ – predsjedavajući

Ne znam napamet kada im mandat ističe, možda 10.aprila 2018. godine.

ALAN ŠERAK – vijećnik SDP-a

Niste shvatili pitanje. Mene zanima, prilikom prihvatanja mandata za vijećnika, da li su i dalje nastavili da obavljaju funkciju predsjednika savjeta mjesne zajednice?

MAHIR DEVIĆ – predsjedavajući

Sve do razrješenje, da, danas ih razrješavamo i postavljamo druge.

ALAN ŠERAK – vijećnik SDP-a

Zar oni nisu, po Odluci, osam dana po prijemu mandata vijećnika, bili u obavezi dati ostavku na mjesto predsjednika Savjeta mjesne zajednice?

MAHIR DEVIĆ – predsjedavajući

Oni su to uradili, ali mi nismo proveli proceduru do kraja.

ALAN ŠERAK – vijećnik SDP-a

Dakle, oni su cijelo vrijeme primali naknadu i za vijećnike i za predsjednike Savjeta mjesnih zajednica.

Ja lično ne prihvatam Odluku o izmjeni i dopuni Odluke o dodjeli mandata za članove Savjeta mjesnih zajednica na području općine Ilijaš iz jednog jedinog razloga, a to je da ne mogu da prihvatim da neko ko je uposlenik organa uprave bude i predsjednik savjeta mjesne zajednice. Našom odlukom nismo detaljno precizirali neke stvari i sada imamo situaciju da neko ko radi u općini bude i predsjednik Savjeta MZ Stari Ilijaš. To nas upućuje da Odluku trebamo mijenjati i ove stvari predvidjeti. Po ovoj Odluci i načelnik općine Ilijaš bi se mogao kandidovati za predsjednika Savjeta mjesne zajednice. Dakle, neke stvari nisu jednostavno spojive jedne s drugim. Očekivao sam da će neko sa navedenom gospodom obaviti razgovor i ubijediti je da to nije dobro, nije moralno i nije korektno s njene strane da prihvati mandat. Ali tako je kako je, nažalost, neko nije odradio svoj dio zadatka.

Alan Šerak će biti protiv ovog Prijedloga Odluke.

MAHIR DEVIĆ – predsjedavajući

I ja lično podržavam da trebamo izmijeniti Odluku o uslovima i načinu kandidiranja, održavanja izbora i dodjeli mandata u mjesnim zajednicama, ali to ćemo raditi u pripremi za 2018. godinu.

MIRSAD OSMANOVIĆ – vijećnik SDP-a

Pridružujem se mišljenju Alana i predsjedavajućeg i ova Odluka koja je podloga za ovu tačku i izbore u mjesnim zajednicama treba je preispitati, ali ne s ovog aspekta o kojem ste vi govorili, nego s drugog. Kada se radi o neposrednom izboru, ko smo mi da u ime građana postavimo predsjedavajućeg? To je pitanje i to da se uvaži prilikom donošenja nove odluke. Da li smo se razumjeli? Evo primjer, načelnik podnese ostavku i mi izaberemo Duraka za načelnika. To su ljudi koji su neposredno izabrani kao i predsjednici Savjeta mjesnih zajednica. Nije to uredu. Iz tih razloga moramo mijenjati Odluku o uslovima i načinu kandidiranja, održavanja izbora i dodjeli mandata u mjesnim zajednicama koja je osnov za donošenje ove druge odluke.

MAHIR DEVIĆ – predsjedavajući

Mi smo je donijeli i mi ćemo je mijenjati. Imat ćemo priliku u narednom periodu govoriti o tome.

MUHAMED HANDŽIĆ – vijećnik BPS-a

O istom govorimo i neći se ponavljati sa kolegama, ali ne slažem se u članu 1. ove Odluke upotpunosti. Pitam se kako će ta gospođa ili gospođica vršiti svoju dužnost, obzirom da je načelnik donio jednu odluku da svaki predsjednik Savjeta mjesne zajednice treba raditi dva sata dnevno u svom uredu i da bude na dispoziciji građanima. Kako će ta gospođa ili gospođica koja je zaposlena u općinskom organu istovremeno raditi i u općini i u mjesnoj zajednici. Pored toga još predlažem, obzirom da je naknada za rad predsjednika Savjeta mjesne zajednice 300,00 KM, a dotična prima i platu od organa gdje je zaposlena, da se odrekne tog paušala i to bi bilo moralno, jer ne obavlja svoju dužnost upotpunosti tamo gdje treba.

MAHIR DEVIĆ – predsjedavajući

Molim vas da ne idemo u personalizaciju. Prihvatam da je odluka manjkava, ali nemojte da idemo u imena i prezimena.

BESIM GLJIVA – vijećnik Stranke za Srednje

Većinu stvari su kolege kazala, a ja predlažem da ne čekamo 2018. godinu, nego da možda već na slijedećoj sjednici Vijeća idemo u izmjene Odluke o uslovima i načinu kandidiranja, održavanja izbora i dodjeli mandata u mjesnim zajednicama. Ja lično ne znam o kojoj se gospođi radi i to je najmanje bitno. Međutim, stara Odluka je tretirala da općinski vijećnik ne može biti predsjednik Savjeta mjesne zajednice, a ja imam Odluku CIK BiH koja to ne tretira. Mi, odlukom Vijeća, u konačnici ne bi mogli oduzeti mandat, ali ne bih se sada time bavio. Ne može se uzeti mandat nekome koga je narod izabrao. Ne bih da pričam o tome, jer se radi o meni lično, a bio sam dugo predsjednik savjeta mjesne zajednice.

Međutim, ja predlažem da Odluku što prije izmijenimo iz razloga koje su kolege navele, i predlažem da se u toj odluci precizira, ako to i dalje želimo, da vijećnik ne može biti i predsjednik savjeta mjesne zajednice, ali i da se navede da to ne može biti ni uposlenik organa uprave. Prilikom kandidiranja za predsjednika, pa i članove Savjeta ne mogu biti lica koja su osuđivana za teška krivična djela, lica osuđivana za ratni zločin, lica protiv kojih se vodi istraga. Također, predložio bih da ovo uradimo što prije.

Kada se tiče člana 3. u u predloženoj Odluci u slučaju smrti jednog od člana savjeta, pošto je odluka i tu manjkava, jedino rješenje je da se provedu izbori za tog člana savjeta.

MAHIR DEVIĆ – predsjedavajući

Ovu Odluku ćemo mjenjati u toku godine, kada se budemo pripremali za izbore 2018. godine, jer ne možemo ovaj posao za mjesec uraditi, imamo prioritetnijih stvari, ali ćemo u toku godine predložiti i podržavam sve što ste rekli, samo to sve treba staviti na papir, uokviriti i tako uraditi.

Sada imamo stanje da trebamo dopuniti ove članove savjete kako je predloženo i da ne trošimo vrijeme.

MUAMER DERVIŠEVIĆ – vijećnik SDA

Iz Službe za opću upravu i lokalnu samoupravu sam dobio informaciju da su svi predsjednici Savjeta trebali da dostave sve informacije vezano za izmjene članova i predsjednika Savjeta. Kao što vidimo, nisu svi dostavili informacije, a ja znam da je u Savjetu MZ Malešići jedan član odjavio prebivalište sa te mjesne zajednice i prijavio prebivalište u jednoj od evropskih zemalja i isto tako bi odluka trebala da tretira i ovaj slučaj, a kako mi reče predstavnik službe ima još ovakvih slučajeva, te stoga tražim od Komisije za poslove mjesnih zajednica i saradnju sa drugim općinama i gradovima da za slijedeću sjednicu Vijeća pripremi Odluku za izmjenu članova Savjeta mjesnih zajednica.

MAHIR DEVIĆ – predsjedavajući

Zašto to nismo uradili danas?

MUAMER DERVIŠEVIĆ – vijećnik SDA

Ja imam informaciju provjerenu u CIK BiH vezano za člana Savjeta MZ Malešići gospodina Aliju Mustafića, a za ostale mjesne zajednice nemam informaciju.

MAHIR DEVIĆ – predsjedavajući

Neka predstavnik Službe za opću upravu i lokalnu samoupravu odgovori zašto svi predsjednici Savjeta mjesnih zajednica nisu dostavili tražene informacije.

MUVEDETA FAZLIĆ – šef službe za opću upravu

Ispred Službe uputili smo dopis svim predsjednicima Savjeta da dostave informacije o eventualnim promjenama u Savjetu i na prošloj sjednici nismo išli sa prijedlogom odluke, jer smo imali saznanja da je došlo do određenih izmjena u Savjetima. Sačekali smo da to bude u jedinstvenoj odluci. Međutim, predsjednici Savjeta su se ogлуšili i niko, osim ova tri, nije dostavio pismene informacije. Mi smo se očitovali sa tim podacima koje smo imali. Obratili smo se Komisiji za poslove mjesnih zajednica i saradnju sa drugim općinama i gradovima koja je nadležna za praćenje rada mjesnih zajednica i svih promjena koje se dešavaju u njihovom mandatu do kraja mandata i da se aktivno uključe i dostave nam informacije.

MAHIR DEVIĆ – predsjedavajući

Odgovorite nam da li je četrnaest predsjednika Savjeta mjesnih zajednica poslalo dopis sa potpisom i pečatom u kojem piše "u mojoj mjesnoj zajednici nema izmjena ili u mojoj mjesnoj zajednici ima promjena".

MUVEDETA FAZLIĆ – šef službe za opću upravu

Nisu poslali takav dopis, a samo su se obratila ova tri sa svojim izvještajem o promjenama. Od ostalih jedanaest nije bilo ni usmenog niti pismenog odgovora.

MAHIR DEVIĆ – predsjedavajući

Ja bih predložio kolegama da danas ne glasamo za ovu odluku, već do iduće sjednice da svi predsjednici Savjeta dostave tražene informacije, a oni koji ne dostave da ih smjenimo i imenujemo nove predsjednike Savjeta. Znači, čekamo šest mjeseci da dobijemo materijal i nakon šest mjeseci ja, kao predsjedavajući, saznajem da jedanaest predsjednika namjerno nije dostavilo tražene informacije.

MUVEDETA FAZLIĆ – šef službe za opću upravu

U Odluci stoji da izabrani vijećnik ne može biti predsjednik Savjeta mjesne zajednice i da ne bi došlo do preklapanja upravo zbog ovih ranijih pitanja, mislim da bi trebalo da idemo sa ovom odlukom, jer ova tri člana nisu sporna sada.

MAHIR DEVIĆ – predsjedavajući

Može i tako. Znači, da izglasamo ovu Odluku, a da zaključkom Vijeća obavežemo predsjednike Savjeta mjesnih zajednica da za narednu sjednicu Vijeća dostave dopunu svih članova Savjeta tamo gdje je potrebno.

MEHMED SMAJLOVIĆ – predsjednik Komisije za poslove mjesnih zajednica i saradnju sa drugim općinama i gradovima.

Nije mi drago da na ovakav način rješavamo određene stvari, ali mi je drago da ipak u kontinuitetu postavljamo i rješavamo ovakva pitanja. I u prošlom mandatu sam bio predsjednik ove Komisije.

Komisija je zasjedala po ovom pitanju i dala je saglasnost na predloženu odluku.

Uz određene izmjene Statuta, Poslovnika i Odluke mogu se stvari riješiti.

MAHIR DEVIĆ – predsjedavajući

Predlažem da usvojimo navedeni prijedlog Odluke i da zaključkom obavežemo sve predsjednike savjeta mjesnih zajednica da za narednu sjednicu Vijeća dostave pismeno uz potpis i pečat dostave imena gdje treba da se nešto mjenja ili tamo gdje ne treba da napišu da nisu potrebne nikakve izmjene. To da bude u prilogu Odluke za narednu sjednicu Vijeća.

AKIF FAZLIĆ – općinski načelnik

Želim se samo referirati vezano za nespojivost predsjednika Savjeta mjesnih zajednica. Dakle, mi možemo govoriti o nespojivosti izbornih funkcija, ali miješati radno pravni status građanina sa funkcijom ne možemo. Dakle, ovdje organ uprave ima isti status kao Vakufska banka, kao JKP "Rad" i Željezara "Ilijaš". Ako može "Alan Šerak" biti predsjednik Savjeta mjesne zajednice Ilijaš I ili "Rešo Osmanović" koji radi u Ministarstvu privrede Kantona Sarajevo, u Ilijašu I, onda nemojmo uposlenike organa uprave tretirati na drugačiji način. Pitanje je vrlo ozbiljno i upitna je zakonitost takve odluke tako da ja sugerišem da se ozbiljnije i meritornije pozabavimo kada je budemo donosili.

BESIM GLJIVA – vijećnik Stranke za Srednje

Odluka o kojoj cijelo vrijeme pričamo nije definisala ni način kako se smjenjuje predsjednik Savjeta mjesne zajednice niti član, jer su to lica izabrana od strane građana.

Vezano za podatke koje nisu dostavili predsjednici Savjeta mjesnih zajednica, želim reći da po mojoj informaciji od njih je samo traženo da dostave imena izabranih vijećnika i umrlih članova, a nije traženo ništa drugo od strane Službe. Nije mi namjera da ih branim, ali ne može predsjednik Savjeta ni znati gdje ko hoda, da li je neki Alija otišao u Ameriku i sl. Nije njegovo ni da ga prati, valjda se on sam trebao odjaviti.

MAHIR DEVIĆ – predsjedavajući

Onda je greška bila u dopisu koji je Služba poslala i u novom dopisu napišite: da li je vijećnik preselio, bolestan, mjenjao mjesto prebivališta i po tom osnovu da vam dostave spisak ljudi i po tom dopisu Komisija će dati novu dopunu odluke i to ćemo dopuniti na narednoj sjednici Vijeća.

MUHAMED HANDŽIĆ – vijećnik BPS-a

Moram dopuniti da ne bi bili u prilici da opet radimo neku odluku ili zaključak. Navodim jedan primjer, a vjerovatno to imaju i drugi. Naime, u MZ-i Luka izabrani član Savjeta mjesne zajednice nikada nije došao na sastanak Savjeta i rekao je da neće, jer mu je motiv bio da bude predsjednika Savjeta mjesne zajednice i obzirom da to nije dostigao on ne dolazi. Mi cijelo vrijeme radimo u "krnjem" sastavu i da su u pitanju donošenje nekih odluka mi ne bi mogli donositi onako kako naš statut dozvoljava.

Ono što načelnik kaže da imaju ista prava, ali evo ja postavljam pitanje vama na vašu odluku koju ste donijeli prije 3-4 godine da predsjednik savjeta mjesne zajednice mora raditi dva sata dnevno, pa pitam kako će ova uposlenica koja je zaposlena u organu uprave provesti ta dva sata i biti na dispoziciji građanima?

ALAN ŠERAK – vijećnik SDP-a

Obzirom da uvaženi gospodin Fazlić tako zdušno brani neke stvari, ja ću dati jedan konstruktivan prijedlog. Predlažem da stavimo ovu Odluku u potpunosti van snage, da se vratimo na prijašnju odluku i da omogućimo i vijećnicima i uposlenicima i načelnicima i ministrima i svim ostalima da budu kandidati za predsjednike Savjeta mjesnih zajednica, te ukoliko budu izabrani neka obnašaju tu funkciju i tako je možda najbolje rješenje da napravimo ovu stvar onako kako treba. Poslužila je svrsi odluka, neki ljudi nisu bili predsjednici Savjeta mjesne zajednice onda kada je trebalo, onda su izbori prošli i sada nema nikakvih argumenata da ovo ne stavimo van snage, pa neka bude predsjednik Savjeta onaj koga narod izabere.

MAHIR DEVIĆ – predsjedavajući

Ovu Odluku ćemo mjenjati kao Vijeće kada dođe vrijeme u toku 2017. u pripremi za izbore 2018. godine i to je najbolji put. Ja bih nas zamolio da prvo usvojimo ovaj prijedlog odluke i tu nema spora.

Općinsko vijeće je većinom glasova usvojilo

Odluku o izmjeni i dopuni Odluke o dodjeli mandata za članove savjeta mjesnih zajednica na području općine Ilijaš

Zatim je Općinsko vijeće većinom glasova usvojilo slijedeći

Z A K L J U Č A K

Zadužuje se Služba za opću upravu i lokalnu samoupravu Općine Ilijaš da uputi cirkularno pismo svim predsjednicima Savjeta mjesnih zajednica sa područja Općine Ilijaš u kojem će tražiti da svi dostave podatke da li je došlo do promjene statusa za članove Savjeta mjesnih zajednica, odnosno da li je po raznim osnovama prestao mandat nekim od članova Savjeta mjesnih zajednica (smrt, podnošenje ostavke, preseljenje na područje druge općine, drugog kantona ili druge države), kako bi se za narednu sjednicu Općinskog vijeća Ilijaš, mogao uvrstiti prijedlog Odluke o izmjeni i dopuni Odluke o dodjeli mandata za članove Savjeta mjesnih zajednica na području općine Ilijaš.

AD-10

Prijedlog Zaključka kojim se odobravaju novčana sredstva u iznosu od 30.000,00 KM (trideset hiljada KM) na ime pomoći licima koja se nađu u stanju socijalne potrebe, a svoja prava ne mogu ostvariti putem Službe socijalne zaštite općine Ilijaš

NIJAZ SPAHIĆ – pomoćnik načelnika

Ovo je treća godina kako mi u sklopu socijalnog programa kako ga mi zovemo, odnosno stalne novčane pomoći donosimo ovakav zaključak kojim Vijeće utvrđuje iznos sredstava koja se plasiraju porodicama koja su u stanju socijalne potrebe na području naše općine. Radi se o iznosu od 30.000, 00 KM gdje je deset mjeseci obuhvaćeno 30 porodica koje dobiju po 100,00 KM i to zovemo stalna novčana pomoć. Ove porodice, to pravo koje propisuje Zakona o socijalnoj zaštiti ne mogu ostvariti iz razloga što ovo pravo se ostvaruje na osnovu toga da niko u porodici nije poslovno sposoban u porodici, zatim ima kvadratura stana gdje se u Ilijašu, pogotovo u ruralnim dijelovima izdavati stanovi koji su smetnja korištenja ovog prava, itd. Ova lica po Zakonu ne mogu ostvariti ovo pravo, a teško žive. Ovdje su, prije svega, porodice bez primanja, višečlane porodice, penzioneri sa minimalnim penzijama koji imaju više članova domaćinstva, samohrane majke i na prijedlog mjesnih zajednica i usaglašavanja sa ostalim institucijama koje se bave ovim poslom napravi se spisak od 30 porodica.

ALAN ŠERAK – vijećnik SDP-a

Ako sam vas dobro razumio, vi do ovih imena dolazite na prijedlog predsjednika Savjeta mjesnih zajednica. Da li smatrate da je to ispravan put? Da li bi možda trebalo uputiti Javni poziv, pa da se prijave svi građani općine? Po meni, ovo nije zakonski ispravno.

NIJAZ SPAHIĆ – pomoćnik načelnika

Kada su održavani sastanci na ovu temu sa nadležnim institucijama i mjesnim zajednicama, mjesne zajednice su na njihov zahtjev tražile, a i najbolje poznaju situaciju u svojim mjesnim zajednicama i postignut je dogovor i to funkcioniše već treću godinu.

Znači, oni dostave podatke, a onda se podaci usaglasa sa Centrom za socijalni rad i ostalim institucijama koje se bave socijalnom politikom na našoj općini, a onda načelnik donese pojedinačnu Odluku i te porodice budu obuhvaćene. Do sada nismo imali problema i mislim da je ovo jedna lijepa praksa. Kad bi uputili Javni poziv, otvorili bi jedan proces gdje bi praktično došli u poziciju da vrlo teško uradimo ono što je sada urađeno. Mislim da naši savjeti i predsjednici Savjeta mjesnih zajednica, kao odgovorne osobe, stoje iza svojih prijedloga i do sada nismo imali problema sa ovim aktivnostima.

ALAN ŠERAK – vijećnik SDP-a

Drago mi je i lijep je ovo nijet i podržavam što se odobravaju ova sredstva u ovom iznosu i što će se finansirati narednih deset mjeseci. Po ideološkom pristupu stranke kojoj pripadam ovo je prava stvar. Međutim, način na koji dolazimo do tih ljudi je apsolutno nelegalan i svaki sud će vam ovu odluku osporiti i valjda vam je to jasno. Niko ne brani predsjednicima Savjeta mjesnih zajednica kada se objavi Javni poziv da nađu ljude i kažu im da apliciraju za ta sredstva. Onda imamo komisiju koja bi to trebala na bazi određenih kriterija sve da pređe i kada dođe prijedlog prema načelniku od trideset imena koji će narednih deset mjeseci da primaju naknadu. Dakle, ovo je nezakonito, a vi kako hoćete.

SEAD ŠEHIĆ – vijećnik SBB-a

Postavio bih jedno pitanje. Kažete da je evo već tri godina ovo praksa i kada ste uspoređivali te spiskove, da li se jedni te isti ljudi pojavljuju u sve tri ove godine?

NIJAZ SPAHIĆ – pomoćnik načelnika

Govorim da mi pravimo usporedbu sa spiskovima iz nadležnih službi. Ako neko ostvaruje pravo putem Centra za socijalni rad ne može ostvariti pravo putem općine, tj. putem ove odluke. Tu pravimo neku usporedbu i vrlo malo se pojavljuje porodica koja su bile korisnici prošle i prethodne godine da su na ovim spiskovima. Možda jedna ili dvije i vjerovato su porodice u takvom stanju.

MAHIR DEVIĆ – predsjedavajući

Cijenim da ipak predsjednici Savjeta mjesnih zajednica znaju stanje na terenu i predlože ljude koji su u stanju socijalne potrebe. Naravno, mogli bi mi govoriti da li bi se ovaj proces mogao učiniti transparentnijim i vjerovatno bi, ali ovo je možda vrlo efikasan model koji radi i mislim da bi ga trebalo podržati.

MUHAMED HANDŽIĆ – vijećnik BPS-a

Ja ovaj projekat podržavam i ovo je za moj protekli mandat i ovaj naravno, jedan od najboljih projekata načelnika općine i službe koja ga provodi. Bio sam predsjednik Savjeta mjesne zajednice i tim ljudima se treba vjerovati, jer oni poznaju puno bolje stanje nego mi vijećnici i ako oni nama u nekom dijelu vjeruju, zašto i mi ne bi vjerovali njima. Neki ljudi koji dobijaju ovih 100,00 KM mjesečno, sigurno ne bi mogli preživjeti bez njih. Volio bih da imamo puno više sredstava za ovaj projekat da ga ojačamo, posebno u ruralnim područjima, jer javna kuhinja u gradu donekle i ublažava ovaj socijalni program. Svaka čast i hvala načelniku što ima razumijevanja za ove najugroženije.

ALAN ŠERAK – vijećnik SDP-a

Da se razumijemo. Ja ovo podržavam i ovo je dobra stvar, ali isto tako nikada neću glasati za nešto što nije u skladu sa zakonom. Nemojte dozvoliti da vam ova odluka padne na sudu. Na ovaj način se do ljudi ne može dolaziti. Postupak mora biti javan i transparentan i jasno je kako se to radi. Nekome davati ekskluzivno pravo da predloži dva čovjeka – hoćemo li mu vjerovati ili ne. Svi mi imamo nekoga koga ćemo predložiti, pa možda on i nije bolji u odnosu na nekog drugog. Neka bude javan postupak, neka bude na oglasnoj ploči, neka bude Javni poziv, ostavljen rok neka se ljudi prijave, predsjednici Savjeta mjesnih zajednica neka sebi uzmu u zadatak da nađu ljude i da ih animiraju da se prijave na konkurs i onda neka nadležna komisija odradi svoj dio posla. Zatim nadležna služba predloži načelniku Akifu Fazliću i onda neka se sredstva isplaćuju. To je suština cijele priče. Formu zakona moramo zadovoljiti.

MAHIR DEVIĆ – predsjedavajući

Ovo nije naslonjeno na Zakon o socijalnoj zaštiti već na jednu odluku nas kako bi popunili taj međuprostor.

AKIF FAZLIĆ – općinski načelnik

Ovdje ulazimo u neku priču o transparentnosti i ne transparentnosti. Ja uvijek postavljam stvari šta je cilj. To je jedna stvar. Drugo, ja kao načelnik i onaj ko izvršava budžet na sebe preuzimam odgovornost. Ovo je vrlo lijepa sugestija od uvaženog vijećnika, nemojte na sebe preuzimati odgovornost i nemojmo onda riješiti stvar kako se rješava. Svi oni koji ostvaruju neka prava po Zakonu o socijalnoj zaštiti prolaze kroz određene procedure. Međutim, mi imamo jednu grupaciju ljudi koji prolazeći kroz to ne mogu da dođu do bilo kakve materijalne pomoći. Mi smo kroz ovaj projekat praktično napravili jednu vrstu socijalne karte na području naše općine. Dakle, ovo nije proces koji se desio juče i prekučer, već se on godinama prati. Prati se kroz jednokratne novčane pomoći, prati se kroz kontakte sa Centrom za socijalni rad, prati se kroz kontakte sa Savjetima mjesnih zajednica i predsjednicima Savjeta, prati se kroz kontakte sa građanima. Dakle, svi mogu predlagati i predlažu. Služba ima listu ljudi i na bazi te liste zaista se izabere u tom momentu kategorija koju cijenimo da je naj ugroženija. Mi prihvatamo odgovornost na provođenju takvog projekta. Koliko god ta odgovornost bila teška, mislim da je ono što radimo i štiteći tu kategoriju od trideset porodica, puno veće i važnije nego od nivoa odgovornosti koji proističe iz načina kako smo do njih došli.

Diskutatana po ovoj tački dnevnog reda više nije bilo, pa je predsjedavajući dao na glasanje predloženi zaključak.

ALAN ŠERAK – vijećnik SDP-a

Zatražio je pojedinačno glasanje.

ZA su glasali slijedeći vijećnici: Mahir Dević, Anel Bumbulović, Muamer Dervišević, Alma Omerović, Mehmed Sinanović, Adem Alić, Saudin Durmić, Armin Matoruga, Semir Dedić, Halid Dizdarević, Melisa Matoruga, Alen Hasković, Akif Bešlija, Sead Šehić, Muhamed Handžić, Almir Špiodić, Edhem Hasanović, Semir Dizdarević, Meho Džindo.

UZDRŽANI su bili slijedeći vijećnici: Alan Šerak, Mirsad Osmanović i Asim Mujić.

Odsutni vijećnici: Rasim Šehić, Damir Filipović i Besim Gljiva.

Konstatovano je da je sa 19 glasova ZA i 3 UZDRŽANA Općinsko vijeće donijelo

Zaključak kojim se odobravaju novčana sredstva u iznosu od 30.000,00 KM (trideset hiljada KM) na ime pomoći licima koja se nađu u stanju socijalne potrebe, a svoja prava ne mogu ostvariti putem Službe socijalne zaštite općine Ilijaš

AD-11

Informacija o stanju kriminaliteta, javnog reda i mira i sigurnosti saobraćaja na području općine Ilijaš za 2016. godinu

OMER KADRIĆ – komandir Policijske stanice Ilijaš

Ovom informacijom obuhvaćeno je stanje kriminaliteta, javnog reda i mira i sigurnosti saobraćaja na području općine iz nadležnosti rada PS Ilijaš i Odjeljenja kriminalističke policije Pete policijske uprave utvrđenih zakonima i Pravilnikom o unutrašnjoj organizaciji Ministarstva unutrašnjih poslova Kantona Sarajevo.

Stanje kriminaliteta na području općine Ilijaš u 2016. godini, u odnosu na isti period prethodne godine, karakteriše smanjenje broja registrovanih krivičnih djela i to za 56 krivičnih djela. Tokom 2016. godine ukupno su registrovana 132 krivična djela (u 2015. godini registrovano je 188 krivičnih djela), od čijeg ukupnog broja su rasvijetljena 73 krivična djela, što u procentima iznosi 55,30%.

Što se tiče javnog reda i mira, u 2015. godini evidentirano je 254 slučaja narušavanja javnog reda i mira.

U 2016. godini registrovano je 62 narušavanja javnog reda i mira.

Kada je u pitanju sigurnost saobraćaja na području općine Ilijaš, u 2016. godini evidentirano je 378 saobraćajnih nezgoda, što je za 06 saobraćajnih nezgoda više nego u 2015. godini.

U 2015. godini kontrolisano je 6764 motorna vozila, a u 2016. godini 16 242 motorna vozila. Također je bitno napomenuti broj prekršaja koji su učinjeni, a u to je u 2015. godini 3075, a u 2016. godini 5516 prekršaja.

Upravljanje pod dejstvom alkohola u 2015. godini bilo je 130, a u 2016. godini 242. Broj isključenih vozača bez položenog vozačkog ispita u 2015. godini bilo 66, a u 2016. godini 219. Broj isključenih neregistrovanih motornih vozila u 2015. godini bilo je 105, a u 2016. godini 305. Bitno je napomenuti da su policijski službenici po naredbi suda od višestrukih povratnika iu izvršenju prekršaja oduzeli 14 motornih vozila. Policijski službenici su osigurali 143 javna skupa.

Ovi rezultati su pokazatelji da je stanje na području općine Ilijaš na zadovoljavajućem nivou. Za sve ovo što je urađeno zaslužni su policijski službenici PS Ilijaš i odsjeka kriminalističke policije. Sve ono što je dobro urađeno njima se treba zahvaliti. Sve ono što nije dobro, ja stojim na raspolaganju, možda sam ja kriv. Nadam se da ćemo u 2017. godini postići još bolje rezultate uz bolju materijalnu opremljenost i nadam se da ćemo povećanjem ljudstva u PS Ilijaš dati bolje rezultate.

MUAMER DERVIŠEVIĆ – vijećnik SDA

Čestitam na rezultatima koje ste postigli u 2016. godini i stanju kriminaliteta na području općine Ilijaš. Ono što me interesuje jeste da li nam možete dati informaciju po pitanju policijske ispostave u Srednjem. Dobio sam informaciju i ne znam da li je tačna da pravni

status te ispostave još stoji kao da ona postoji i da neki policijski službenici nose rješenja kao da rade u Srednjem. Da li je to tačno i imate li bilo kakve informacije od Ministarstva unutrašnjih poslova Kantona Sarajevo, kada će se to uzeti u razmatranje. Sredstva postoje.

Da li je tačno da su se u 2016. godini desile samo tri šumske krađe na području općine Ilijaš kao što piše u izvještaju.

ALMIR ŠPIODIĆ – vijećnik BPS-a

Pohvali bih rad PS Ilijaš. Imam jednu sugestiju roditelja iz Lješeva da se, u periodu kada djeca dolaze u školu i kada se međusmjena, pojača policijska patrola i ako je moguće da se postavi radar obzirom da je škola pored regionalne ceste. Nekada je bio postavljen radar i vozači su vodili računa, ali sada nema radara i ponovo su vozači nesavjesni.

MUHAMED HANDŽIĆ – vijećnik BPS-a

Nije navedeno u ovom Izvještaju, ali evidentno je da je prestala krađa kablova na području Bioče. Ovdje ne piše na koji način ste to spriječili, a činjenica je da ste spriječili i jesu li pohvatani ti kriminalci.

SAUDIN DURMIĆ – vijećnik SDA

Zabrinjavaju me teška krađa i krađa. U proteklom periodu smo imali jedno drsko razbojništvo na području Mjesne zajednice Misoča, a radi se o oružanom napadu i razbojništvu i koliko imam informacija da počinioci tih djela još nisu uhvaćeni. Smatram i podržavam vašu informaciju obzirom na vaše kadrovske i tehničke mogućnosti i ne sumnjam da niste poduzeli maksimum mjera i da to nećete u narednom periodu riješiti. Ako možete da nam date neke informacija ako ne to ne zadire u istražne radnje.

OMER KADRIĆ – komandir PS Ilijaš

Što se tiče policijske ispostave Srednje, imamo policijske službenike koji imaju rješenja za obavljanje policijske dužnosti u policijskom odjeljenju Srednje. To i nama predstavlja problem, jer svakog dana šaljem patrolu na treći sektor i to nam stvara troškove. U planu je da radi objekat u Srednjem, a dokle se stiglo s tim ne znam.

Kada su u pitanju šumske krađe, evidentirane su tri i riješene su. Više ih nije ni bilo. To smo zaustavili i naše je u transportu, a naše nije da idemo u šumu. To je posao šumara. Naravno da smo na raspolaganju i moj mobilni telefon je dostupan 24 h i patrola će na svaki poziv izaći na teren.

Što se tiče Lješeva, u više navrata smo postavljali radarsku kontrolu i to ćemo nastaviti raditi, ali ćemo promijeniti taktiku. Staviti ćemo civilna vozila i radar.

Na području općine ima dosta škola i mi nastojimo u jutarnjim satima kada đaci dolaze u škole da pokrijemo skoro sve škole na području općine Ilijaš, a i u Lješevo ćemo uputiti, ako ne patrolu, onda rukovodioca sektora ili policajca u zajednici da izvrši obilazak škole i da se nađe na usluzi.

Što se tiče krađe kablova u Bioči, u zadnje vrijeme nema ih, a to smo riješili redovnim obilaskom civilnim vozilima tako da nam je to stalo i ja sam zadovoljan.

Pitanje razbojništva u Misoči – radimo na tome i to nam je jedino od razbojništava ostalo još ne riješeno. Tri su izvršena, dva su riješena i jedno je ostalo. Radimo na tome. Dovođena su neka lica i vođena na poligraf i ispitivanje, ali to nije dalo dovoljno rezultata i

nastavit ćemo raditi na rasvjetljavanju ovog događaja.

MEHMED SMAJLOVIĆ – predsjednik Savjeta MZ Mrakovo

Kao građani i kao ljudi koji obnašaju određene funkcije treba da pomognemo policijskoj stanici. Ovdje niko ne spominje tužilaštvo, niko ne spominje one ljude i subjekte koji su nadležni, evo recimo da u saobraćaju obezbijede horizontalnu i vertikalnu signalizaciju. Tužilaštva šalju povratne informacije da nemaju dovoljno elemenata za krivična djela. Mislim da je ovo dobra sugestija da ovdje napravimo kvalitetnu koordinaciju, evo policija sve odradi i postigne vrhunske rezultate, a zamolimo ih da i izađu i pored ovog što nemaju nadležnost, ali čini mi se da tužilaštvo, inspekcija za puteve Kantona Sarajevo i oni koji participiraju u ovom sektoru saobraćaja, kriminaliteta itd. ne daju rezultate. Predlažem Općinskom vijeću da razmisli koji je to metod: je li to putem Pravobranilaštva Kantona Sarajevo, je li to putem vijećničke inicijative ili zaključka da se uputi nadležnim. Predlažem da zakonske stvari popravljamo u kantonu kroz skupštinu i kroz federalni parlament.

Diskutanta po ovoj tački dnevnog reda više nije bilo, pa je OV-e primilo k znanju

Informaciju o stanju kriminaliteta, javnog reda i mira i sigurnosti saobraćaja na području općine Ilijaš za 2016. godinu

Zatim je predsjedavajući Mahir Dević zaključio petu sjednicu OV-a Ilijaš u 12:00h.

Zapisničar:
Maida Habibović

PREDSJEDAVAJUĆI
OPĆINSKOG VIJEĆA ILIJAŠ

Mahir Dević, prof.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
Broj certifikata:20938

